

P.P.A: 39 aña sirbiendo pueblo

ORANJESTAD (AAN)- Ayera, 23 di October 1988, tabata exactamente 39 aña pasa cu un grupo di ciudadanonan preocupa a dicidi di funda Partido Patriotico Arubano (P.P.A.), esta 39 aña cu e organizacion politico ta sirbiendo e comunidad den e arena politico Arubano, tanto den gobernacion como oposicion. Siguiementemente PPA ta duna un relato di nan añanan di existencia.

P.P.A. a worde funda pa varios motibo. E.o. un diferencia di principio ariba tereno estatal pero tambe cu e meta di bringa e fenomeno di e tempo ey esta Emanismo. Emanismo cu tabata zorg pa un diferencia den trato entre e homber di Playa y e homber di campo, e rico y e pover, e blanco y e preto. Ta pesey e base y meta di PPA tabata semper igualdad entre tur ser humano.

Statutonan di P.P.A., aproba pa disposicion di gobierno no. 839, dia 8 di Augustus 1950, articulo 3 ta splica su obhetivo: e.o. A. autonomia di Aruba, basa ariba e rapport conoci como Rapport van Poelje presente pa decreto real 14-6-1948, no. 29

B. Promocion di un mihor comunidad ariba tereno spiritual, social y economico, basa ariba libertad spiritual y politico..

C. Respet pa derechonan Constitucional y material di e pueblo.

D. Desaroyo y expansion di propio fuentenan economico y promocion di seguridad di trabao pa tur hende sin distincion di religion, color, raza of nacionalidad.

E. Mantencion di igualdad di enseñanza publico y priva.

F. Promocion general di interesnan di Aruba, ariba tur tereno cu ta necesario of util.

Algo unico di PPA pa su 39 aña di existencia ta, cu den 39 aña PPA no a plak ariba su mes ningun etiqueta di ningun ideologia existente. PPA

semper a practica Husticia social y semper a demostra interes grandi den e desaroyo propio di cada individuo.

Democracia semper a worde carga halto den bandera di PPA.

PPA ta spiritualmente ta kere den un ser supremo cu ta na cabez di Universo y PPA tin respet pa tur religion.

PPA ta ademas un partido realistico cu ta tene cuenta cu realidadnan di bida. Por lo tanto PPA tin un concepto pragmatico basa firmemente ariba husticia social y desaroyo personal.

Den su 39 aña di existencia PPA a laga su stempel especialmente ariba e desaroyo economico y social di Aruba.

Tempo cu partido PPA a presenta su plannan den Eilandsraad di Aruba pa bay traha ariba un industria turistico, PPA y su lidernan a wanta hopi critica di e oposicion di e tempo ey esta partido AVP.

Ora cu fundador di e partido a anuncia: 1. Expansion di WEB. 2. Construcccion di un carretera (boulevard). 3. Funda Aruven. 4. Construcccion di Hotel Aruba Caribbean. 5. Construcccion di un hospital nobo. 6. Un aeropuerto nobo, tabata tin hilaridad den Eilandsraad.

Cabritonan lo bay drumi den hotel, awa for di un planta nobo lo bira mucho caro pa pueblo por bebe, carretera cu lo costa hopi placa pero lo no tin suficiente vehiculo ni tampoco e necesidad di uza tal carretera, un aeropuerto na unda ningun avion casi lo no baha etc. etc.

Palabranan di fundador di PPA tabata cu un dia turismo lo ta salbacion di Aruba si acaso Lago dal su portanan cera. Lago cera su portanan, otro hilaridad, ken por pensa algo asina.

Historia a demostra cu PPA tabata tin un vista hopi cla pa futuro. Awe 1988 ta un realidad cu planificacion di partido PPA



a salba e pueblo Arubano despues cu lago a cera su portanan, loke ta tumando lugar awe ta simplemente un desaroyo complementario.

Awe, AVP kier pretende cu ta nan uzando e pilar turistico a salba Aruba mientras cu esaki a tuma lugar door di e gran estadista Arubano, sr. Juan Enrique Irausquin.

Emanismo di antaño tabata trece cunele cu ta solamente e yiunan di e shonnan di Playa por a bay exterior bay studia. Partido Patriotico Arubano a kibra e barera aki introduciendo e posibilidad pa becanan pa tur mucha a base di su capacidannan.

Si, den pasado e pover mester a bay cerca e shon na Playa pa pidi un cent cora pa por cumpra algo di come, siendo pues independiente di e shon su kier, PPA a kibra esaki introduciendo onderstand, y pensioen di viehez pa cada ser humano no tin nodo di depende di otro pa su primera necesidadnan.

Na 1986, PPA a forma parti di Gabinete Eman pa 1 aña y 23 dia te cu traicion y tendencianan racista y falta di respet

pa democracia den partido a pone cu e gran mayoria di partido a tuma un decision di principio pa suspende despues raya, dos miembro di Staten. E caso aki tabata un di principio, 2. miembro di Staten ocupando asientonan di partido no por bin dicta partido kico mester tuma lugar internamente den partido y den gobernacion.

Huez den promer instancia a duna directiva di partido razon.

PPA a contribui substancialmente na gobernacion:

1. Mancho liberal di aviacion (open sky policy).
2. acuerdonan di aviacion cu Merca, Venezuela.
3. acuerdonan administrativo

cu St. Domingo, Colombia, 4. Projectonan na Aeropuerto: Pista di aterizahe, mas espacio comercial, edificio carrental etc.

5. Air Aruba fase 1, 6. Tele-comunicacion: a. internacional central (completo); b. groundstation (su preparacion); c. telex-central (preparacion); d. edificio na Seroe Blanco, y mucho mas. Probando cu PPA a keda un partido productivo.

Directiva y consejo di partido kier gradici e pueblo pa e sosten continuo durante 39 aña di existencia. Danki y mas danki". Te asina leu e relato di Partido PPA.



1949

DANKI PUEBLO

PA BO SOSTEN DURANTE
39 ANJA



1988

TABATA Y TA UN HONOR Y PLACER
PA SIRBI NOS COMODIDAD

Directiva y Consejo di
Partido Patriotico Arubano (P.P.A.)